

Minister Paul Croes:

Ta bay nombra un Citgo Helpdesk pa apoya personanan cu kier traha den e refineria



ORANJESTAD (AAN): Manera a ser treci dilanti caba den DIARIO, Gobierno ta papiando di un Helpdesk di Citgo. Segun minister Paul Croes, den e reunion publico a bin pregunta riba e helpdesk. Ta bay nombra esaki e Citgo Helpdesk. Esaki ta un combinacion di trabao entre departamento di Labor, DI-MAS, pero tambe ministerio di Energia, unda cu ta bay apoya personanan cu kier traha den refineria, cu e proceso aki. Naturalmente no ta bay kita personanan cu kier

aplica directo na e Human Resources di e compania Citgo na momento cu esaki haci su reapertura.

Awor aki ta den fase preparatorio, introduci e oficina aki. E lo ta un oficina unda cu ta apoya personanan cu ta desea, cu tin experticio riba tecnica, experticio den e refineria, pa asina logra un empleo den e refineria. Ta asina cu durante negociacionnan, presidente y hunta directiva, a yega na palabracionnan riba e cantidad di trahadornan local cu lo mester traha den refineria, pero tambe den posicionnan mas halto, supervisors, director, etc. Na momento cu a anuncia e Citgo Helpdesk, den su preparacion, a ricibi yamadanan caba for di diferente luga internacional, unda cu Arubianonan cu ta trahando den exterior, a muestra un interes di inmediato pa por bin labora aki na Aruba.

Despues di esfuersonan grandi, tin cu bisa esfuersonan serio di parti di minister Mike de Meza, negociacionnan den un forma structural, den forma strategico, enfatisando, pa logra yega na e directiva, na e presidente di un compania grandi asina, tabata tuma hopi esfuerso, perseverancia, hopi tactica y strategia, a logra esaki y na momento di a logra e enlace aki, a cuminsa bay e ora riba e aspectonan fiscal, e aspectonan di trabao, e aspectonan di e modelo di operacion, pero tambe e aspecto

laboral. Con bo ta stimula cu yiunan di tera, por awor aki traha den un refineria cu ta di bo propio pais y cu na e momentonan aki ta bay tin un modelo di Lease. Door di tin e enlace importante aki, e refineria ta basicamente ta di e pais y ta huur'e cu otro partido, tin un influencia mas directo pa apoya yiunan di tera yega na trabao den e refineria. Naturalmente Croes no ta conoci cu e tipo di traboanan di cerca den refineria, pero cu e comision cu lo forma, entre departamento di labor, personanan cu ta mira riba e mercado laboral, cu ta bay tuma e datonan di Arubianonan aki, pa por traha, hunto cu expertonan tecnico, cu ta haciendo un evaluacion tambe di e curriculum di e personanan aki, lo propone na e Human Resources di Citgo, un enlace directo pa asina por yega na pone nos yiunan di tera na trabao.

Ta premira cu un reapertura lo nifica algo hopi positivo pa e empleo den nos pais. Ta calcula hasta un caida di 1 pa 2% den e cifra di desempleo na momento cu tin un reapertura. E impacto di esaki lo ta enorme pa nos pais. 2016 ta bay bira un aña hopi positivo, cu un reapertura pero tambe cu tur otro proyectonan cu ta bezig cune y esey ta e mensahe cu kier transmiti di confianza na henter comunidad, comercio y tambe na sector publico, Croes a finalisa.